

profecto est, quam quod salva speciei idea tolerari possit. Idem fere de *Agrostide vulgari* et *Equiseto umbroso* l) Willd., plantis sui generis distinctissimis, statuo; quæ cum promiscue crescunt, maximamque vegetationis partem certis regionibus constituunt; tum nescio, cur de earum specifica differentia dubitemus: aut si, qui coadunare velint, consentaneum esse naturæ putent, certis ac indubitatis principiis confirmare debent sententiam. Neque enim natura ex sola suspitione, h. e. pro lubito semet tractari patitur.

#### §. 31.

Ut vero hæc, quæ nunc sparsim tractavimus, paullo melius illustrentur: utque harmonia virium in natura vegetationis agentium, cum suis causis atque effectibus appareat, simulque analogia partium, ex eadem lege pendendum perspiciatur: placet, quoniam res ipsa postulare videtur, ut rationem earum, quarum supra mentionem fecimus, rerum qualitercunque reddamus, conspectum dare formarum in Svecia præsertim boreali occurrentium, cum

---

l) *Equisetum umbrosum*, vulgatissime in Lapponia obvenit, sed sæpius prætervisum, quia spicâ florifera præcox atque caduca; caulis autem sterilis *E. arvensi* simillimus. Cum *E. sylvatico* nil commune habet.